

Placentero Ritmo y Cuerde cu cassette nobo

ORANJESTAD (AAN) Placentero Ritmo y Cuerde e aña aki ta bolbe lansa un bunita Cassette cu piesanan dedica na Aruba y su hendenan.

Mayoria di e piesanan ta composicion di e integrantenan di e grupo mes. Entre otro tin piesanan di Robert Maduro, Tico Kelly y tambe tin dos piesa cu derecho reserva.

E bautismo di e cassette lo tuma lugar durante Showtime Diadomingo 13 di Mei, dia di Mama den un show especial na

e CentSo di nos grandinan Huize Maristella.

Despues lo tin un tremendo fiesta bailable cu caja di orgel, Memmy's disco y naturalmente Placentero Ritmo y Cuerde den Casibari Pink Patio, caminda cu un y tur por bin disfruta di piesanan riba nos cassette di 1990.

Lo bay tin champagna na abundancia pa tur e Mamanan di Casibari y premionan pa e mihor bailadonan di wals.



Grupo di baile "Teatro Danza Arubano" a sali pa Hulanda



ORANJESTAD(AAN) -- Recientemente e grupo di baile "Teatro di Danza Arubano" bao direccion di Diana Antonette a sali pa Utrecht, Hulanda, ariba invitacion di "Stichting Multi-Culturele Activiteiten Utrecht".

Esaki pa representa Aruba na e Festival di "Multi Etnische Podium", cual lo ser teni desde 11 te cu 13 di Mei venidero na Utrecht.

Ademas lo haci uso di e oportunidad di duna varios presentacionnan di nos bail folklórico den otro lugarnan Europeo tambe.

"Teatro di Danza" ta gradici e colaboracion ricibi for instancianan manera Aruba Huis, KABNAA, UNOCA, ICA (Instituto di Cultura), CCA, Consales pa e bunita sweat-shirts. Diasabra 19 di Mei "Teatro di Danza" lo regresa Aruba.

Consehero di embahada Frances na Aruba

ORANJESTAD(AAN) -- Actualmente ta na Aruba Jean Claude Lalou, consehero pa asuntonan economico na embahada Frances na Caracas.

Lalou a haci un bishita di cortesia cerca vice Promer Ministro Pedro Kelly y tambe a tene un encuentro di Ministro di Finanzas Guillermo Trinidad.

Den horanan di atardi e consehero Frances a reuni cu Ministro di Trafico y Comunicacion Elio Nicolaas.

Despues el a reuni cu representantenan di: Banco Central, Aruba Investment Bank, Aruba Foreign Investment Agency. Lalou ta haciendo e bishita na Aruba pa haya mas informacion encuan to e desaroyo socio economico y financiero di Aruba.

